

## **Spich di Minister Kajsa Ollongren di Asuntunan Interno i Relashonnan den Reino, na okashon di Konmemorashon Nashonal Pasado di Sklabitut**

**Spich | 01-07-2021**

[teksto verbal spich]

E ta un logo ku tres lèter, trahá di heru i mas o menos 4 centimeter grandi. ‘WIC’ tin pará riba dje. Ku e heru kayente aki West-Indische Compagnie tabata laga marka hende hònber, hende muhé i mucha sklabisá. Manera bestia.

Esaki tabata sosodé dor di hunta nan kueru ku zeta i primi e heru kayente riba e kurpa. Despues tabata limpia e herida ku awa di lamunchi i pòlbu. Esun ku a pasa den esaki, tabata propiedat di un otro i rekonosibel mesora den kaso di un intento pa hui.

Hende sklabisá no tabata pèrdè nan kurpa so. Nan tabata pèrdè nan nòmber tambe. E nòmber afrikano ku bo mayornan a duna bo ku amor, generalmente tabata hala un banda pa un nòmber nobo, ku pa e doño di katibu tabata fásil pa pronunsiá. For di aw bo tabata yama Klaas, Jan òf Eva.

Esun ku nan bende ku un siguiente doño di katibu hopi bia atrobe tabata haña un otro nòmber. Tabata kima un logo nobo riba bo kurpa. Un hende sklabisá no tabata mas ku merkansia.

A transportá diesun mion hende sklabisá pa otro banda di Oséano Atlántiko. Un 445.000 di nan a bai para den e kolonianan hulandes. Un kantidat deskonosí di otronan a muri na kaminda.

Awe nos ta rekordá i selebrá ku Hulanda, 158 aña pasá, dia promé di yùli 1863, ofisialmente a abolí sklabitut na Sürnam i e Antia Hulandes di ántes. Maske ku no a kaba realmente e ora ei. Hendenan mester a sigui traha dies aña mas riba plantashi.

Ta ku repudio, repentimentu i bèrgwensa so nos por mira e pasado di sklabitut. Un pasado ku nos tur tin laso kuné. Konsiente òf inkonsiente. Bisto òf yùist skondí den un historia di famia deskonosí.

No ta un prueba di debilidadat pa duna nos kuenta di esaki. Hustamente asina un demokrasia ta mustra su poder. Enfrentando nos pasado, nos por kambia nos futuro. Esei no ta un luho, sino un nesesidad.

‘Ningun pueblo no por yega na madures completo, si e a sigui ku un sentido di inferioridat heredá’, Anton de Kom a skirbi. De Kom a mustra nos riba e horror di sklabitut i rasismo, pero e mes no a haña un bon trato na man di e gobièrnu hulandes. P’esei e meresé rehabilitashon.

Tres aña pasá tambe mi a para na e lugá aki. Ora mi wak bèk, mi ta mira kua paso a tuma for di e tempu ei. Tambe mi ta mira kuantu kos ainda mester tuma lugá.

Despues di e morto violento di George Floyd aña pasá, desena di miones di hende rònt mundu a subi kaya. Tambe na Hulanda. Nan a duna di konosé ku e venenu di rasismo ainda no a disparsé for di nos komunidad. A surgi un diskushon, ku lo no paga mas.

Niun hende ke pa nan yam'é rasista, pero ku esei nos no por splika i keda sin hasi kaso di rasismo i diskriminashon. Tin bia ta fásil pa mustra riba e odio i e prehuisianan. Por lo general ta mas sutil.

Pa di tantu bia a nenga di duna bo un stazje òf un trabou.

Na porta di un klup a nenga di laga bo drenta.

Bewaker ku ta kana tras di bo den un pakus.

Den e tempu aya a kibra e kadenanan, pero ainda tin un kaminda largu pa bai. Den esaki nos komo gobièrnu tin ku kana dilanti. Señal for di komunidad tokante forma di eksklushon i marginalisashon públiko i skondí, ta kos ku nos ta bai investigá i kombatí. Esei nos ta hasi ku ayudo di un Komishon di Estado i un Kordinadó Nashonal kontra Diskriminashon i Rasismo. Tambe na 2023 nos ke rekordá di un forma grandi i digno ku 150 aña pasá, na 1873, sklabilitut efektivamente a pasa pa historia.

Awe, Kolegio konsultativo diálogo di pasado di sklabilitut, ku e gabinete a instituí, a presentá su konseho. E ta hasi un yamada pa laga pasado di sklabilitut forma parti di nos memoria kolektivo: ku investigashon di e ròl di e gobièrnu nashonal, enseñansa i un museo dediká na sklabilitut. Tambe e kolegio ta pidi pa un dia nashonal di konmemorashon. No por último e Kolegio konsultativo ke pa gobièrnu pidi dispensa.

E konsehonan aki ta interesante i no ta laga lugá pa duda. Nos no por evitá esei. Nan ta kuadra ku e urgensia ku mi ta sinti. Ya Amsterdam, Rotterdam i Utrecht a hasi un investigashon históriko. Den Haag tin e intenshon di hasi esaki. Tambe diputadonan di e kuater siudatnan grandi a hasi un apelashon pa un dia nashonal pa konmemorashon di e pasado di sklabilitut.

Konmemorando, nos por wak futuro i komprometé nos mes na un komunidad kaminda no tin lugá pa rasismo i desigualdat den oportunidat. Pero tira bista atras ta nifiká mas ku studia pasado. E ta nifiká duna kuenta tambe.

Aktualmente, den e Rijksmuseum, por mira un ekshibishon impreshonante ku ta hasi e pasado di sklabilitut palpabel. Eiden tin tambe e heru ku mi a papia di dje na komienso ku nan tabata usa pa kima.

Mi ta realisá ku e doló ku e heru tabata okashoná ainda no a disparsé. Ku e heridanan ku el a kousa ainda no a kura. Ta un proseso ku ta sigui durante hopi generashon.

E filósofo Augustinus a skibi mas ku 1600 aña pasá: 'Speransa tin dos yu muhé presioso, rabia i kurashi. Rabia tokante e kosnan manera nan ta i kurashi pa kere ku nan lo no keda manera nan ta.'

En berdat mi ta kere ku ta asina ta bai.

Pa por sigui huntu, mester tin espasio pa tur dos.

Espasio pa rabia pa un pasado doloroso.

Pa rabia tokante e desigualdat ku te ainda ta eksistí.

Pa rabia tokante kambionan ku ta bai muchu slo.

Pero kurashi tambe ta na su lugá.

Kurashi pa atmití e rabia i doló di e otro.

Kurashi pa enfrentá nos pasado komun.

Kurashi pa habri un kombersashon ku otro.

Pasobra t'esei ta konta. Nos no mester enfrentá otro, sino para banda di otro. Nos mester siña mira mundu ku wowo di un otro. Kada dia di nobo, maske kon difísil i doloroso esei por ta tin bia.

Mi ta yama boso masha danki pa boso atenshon.